



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

Asia semdangba mapang Kim
den ajurutepler: Trump

Benjung mapang Bihar nem special
train peria magütsür: Rahul Gandhi

VOL. XXIII ISSUE NO. 19 (ADOK 19) DIMAPUR AMUNGNÜ (SUNDAY) MONGPUTENI (OCTOBER) 26, 2025

₹ 5.00

Construction sector ajanga asen lanur nem mapa agütsür: Dr. Rio

Dimapur, October 25, 2025 (TYO): Nagaland adena orr mapa angudak wadang tulutibaji construction sector lir aser iba ajanga asen lanur meyrjang aika nem mapa agütsür ta Chief Minister, Dr. Neiphiu Rio-i ashi.

Association of Nagaland Architects (ANA) pur 25 buba Anniversary nung jembidang Dr. Rio-i architects aser züngsemtem dang asen lisopurtem ajungmesotsü aser arangshitsü ayongzük.

Lisopur masons, engineers, aser artisans nem tashi agütsüba ajanga parnoki ki yangluba dang masü saka parnok careers yanglur aser asen rongsenketzüng tashi itdaksür ta Dr. Rio-i ashi.

Architects ya ki purateta yanglurtem dang masü saka asen senmang wazüka ayurtem aser sobaliba o mangdang meyipzükertem lir. Architect ajanga asen Naga sobaliba inyaksangshi nung tanü putu den apert tajungba bendenloker

ta paisa ashi.

Nagaland sorkari architects-i shilem tajung agiba atema pelar. Nenoki maneni tobur tajung dang masü saka lendong nungi jembua alitsüsa purapiteta yanglutsü ayongzük ta Dr. Rio-isa ashi.

JP Park & Banquets, Chumoukedima nung agiba sentong nung Chief Minister Dr. Rio-isa exhibition stall lapoktsü aser item nung homes & décor indang osetsüsettem sayu.

"Nagaland indang architecture ajanga nübortem maitsü sayur. Tatishitsü aketba Naga morungs ya kiojen dang masü saka lokti, maitsü aser külem shisatsü sayudak lir" ta Council of Architecture, India Member Dr. Gauri Nitin Shiurkar-ia ashi.

"Tanü architects tasentemi tesüiba shisatsü den tarutsü taginübatem densema purapiteter. Iba sempet tajung ajanga pei maitsü mesamadaksür aser Naga architecture khenyongi balaka kümdaksür" ta Dr. Gauri-isa ashi.

Telok balalai JCC pusema nungittsü bangjemshir

Dimapur, October 25, 2025 (TYO): Nagaland Secretariat Service Association (NSSA)-i Indian Administrative Service (IAS) cadre nung nisung timi anioktsü atema JCC pusema nungittsü aser amalitepa aotsü bangjemshiogo.

Ano, Engineering Associations 8 züngsema aliba Federation of Nagaland State Engineering Services Associations (FONSESA)-ia State sorkari onük ana akhangba ama meinyak tashi JCC pusema nungittsü bangjemshiogo.

Maneni, Nagaland Finance and Accounts Service Association (NF&ASA)-ia JCC pusema nungittsü tenangzükba agiogo.

October 24, 2025 nü Confederation of all Nagaland State Service Employees' Association (CANSSEA) den affiliated Associations 50 shi Emergency Executive senden ka ayonga amen.

Iba senden nung Non-State Civil Service (Non-SCS) quota kübok IAS officers aniokba indang onük benoka lemsatet.

Senden nung iba onük jungjunga jembitepba sülen Joint Coordination Committee (JCC) pusema nungittsü bangjemtem. Parnokisa meritocracy nung ajemdaker candidates shimtsü aser public service commission ajanga mapai aiterkem dang shimtsüla ta nenshia metetdaksü.

Nagaland In-Service Doctors' Association (NIDA)-ia Annual General Meeting (AGM) amandang JCC den külemi noktaksü telemtetba agiogo.

Sorkar mapa inyakterem aser ketdangsübaren ya sentsü alir nisung kar masü saka nübortem tenzüksü atema lir. Sorkar ketdangsübaren nung tejak repranga aser peii shimnüba nübotem dang shimra public-i temulung alemba samar ta JCC-i metetdaksü.

M.I.P, NSCN/GPRN-i jangjashitsür

Dimapur, October 25, 2025 (TYO): October 20, 2025 nü Arunachal Pradesh kübok Naga Regions- Tirap, Changlang aser Longding (TCL) nungi prangpong-injangtem G.H.Q, Suruhuto Designated camp-i bener arudang osang tongteprater shitak masüba agi Indian security forces-i Chozuba nung apu.

Arunachal Pradesh nung tensa mejungi akümba atema prangpong-injangtem meyipa bener aru. Iba Region nung yimjung lidaktsütsü mechi nung iba mapa inyak. Nagaland nung

dang cease-fire liaka Naga nung aliba tesem ajak nung ozü civil aser military züngsemtemi Indo-Naga yimten yimjung olemtep pusema noktaker ta M.I.P, NSCN/GPRN-i sangdong ka nung ashi.

NSCN/GPRN-i sendaktepa alir ajaki aginüba ama yimjung maparen pusema nungiter. Anungji Indo-Naga yimten olemtep nung timtem magütsütsüsa sendaktepa alir ajaki kümdanga aser süoki ia inyaksüla ta MIP-isa sangdong ka nung metetdaksüogo.

Delhi nung 4 buba Autumn Festival takok ngua mungogo



Kevin Kelly, Ambassador of Ireland to India, Temjen Imna Along, Minister of Tourism & Higher Education, Government of Nagaland aser Abu Metha, Adviser to the Chief Minister of Nagaland aser Chairman of IDAN nung October 25, 2025 nü New Delhi nung Nagaland House, Autumn Festival agidang tangokba noksa nung angur.

Dimapur, October 25, 2025 (TYO): October 24, 2025 nü Nagaland House nung anogo ananü Autumn Festival 2025 tenzüka amungba tanü takok ngua tembangogo.

Iba benjung tembangba sentong nung Ambassador of Ireland to India Kevin Kelly-i tongti tesemdang ka ama shilem agia liasü.

Iba benjungmung nung Tourism & Higher Education Minister Temjen Imna Along-i chief host aser Adviser to the Chief Minister of Nagaland & IDAN Chairman Abu Metha-i co-host ama shilem agia liasü.

"Iba benjung ajanga Naga maitsü kanga junga sayuogo aser iba ajanga senmang ya kodanga mesamar, putu den apert melenshir aser lemsateper asüba nenshir" ta Kevin Kelly-i ashi.

Sobaliba ya sayutsüba masü saka asenok nisungtem den tongtipang shilem ka lir. Iba ya Irish foreign policy nung tongti shilem agir ta Kelly-i ashi.

Ireland, India aser Nagaland tsünga putiotsü mesüktepa lir aser asenok ajak British yimsüsüba nungi nüjiso angurtem lir. Linük ka indang tashiji nübor ajak aser temeyoktep nung amendaka lir, ta Ambassador of Ireland-isa ashi.

"Ireland-i India den tesentaktep akanga lir aser shishilembaba, shisaliok, research aser cultural collaboration nung temulung agütsür. Ireland aser Nagaland na külemi lemsatepbaji maitsü nung temulung agütsüba aser maitsü balala akhümtsübutepba lir" ta paisa ashi.

Taküm Hornbill Festival ajangshitsü atema pa den külemi medemertem Nagaland-i arutsü yongyar ta Kelly-isa shisem.

Yashi benjung lapokba sentong nung Minister for Tourism, Art and Culture, Government of NCT Delhi Kapil Mishra-i tongti tesemdang aser Ambassador of Thailand in India Chavanart Thangsumphant-i akakteta jaoker ama shilem agia liasü.

Sentong nungsa Union Minister of State for Personnel, Public Grievances and Pensions of India Dr. Jitendra Singh aden.

Delhi aser Nagaland tsünga tesentaktep ya adianu ama lir. Tarutsü nung Delhi Tourism den külemi Nagaland indang sobaliba benjungtepnür ta Kapil Mishra-i ashi.

Iba benjungmung atema Chief Host ji Tourism & Higher Education Minister Temjen Imna Along lir aser pai tesentepertem

dang Nagaland semdangtsü aser Naga nung sobaliba balaka ajangshitsü ayongzük.

"Hornbill Festival mapang media nisungtem arur Nagaland sobaliba takar reprangtsü jaoker. Iba ya lisopur benjung ka dang masü saka benjung khenyongi balaka lir. Tanü-asüngbo Inner Line Permit angutsübaji tasak masü aser online ajanga yangluteter" ta Minister Imna Along-i osangbener den jembidang ashi.

Anogo ananü benjungmung nung Colored Keys, The Mahila Band, The Eastory Project, Tiatemsu Jamir aser Kiki Longkumer nungeri ken ajanga shilem agi. Maneni Kintem-i design asüba 'The Indigo Medley' subotsütem sayua liasü aser Joint Resident Commissioner, Nagaland House, New Delhi Sharon Longchari-i tesentepertem pelaa agizük.

4 buba Autumn Festival ya 26 buba Hornbill Festival agizükba benjung ka ama amung.

Iba benjung ya Tourism Department, Government of Nagaland-i Principal Resident Commissioner's Office Nagaland House, New Delhi den yaritepa ayongzük aser Ministry of Tourism, Government of India-ia teyari agütsü.

Ongpangkong Kaketshir saru molok agi shisashirtem yariba mapatong tenzük

Mokokchung, Mongputeni/ October 25(TYO) : Tanü Ongpangkong Salang Mokokchung nung Ongpangkong Kaketshir Mungdang(OKM)-i achayanga shisashirtem nem teyari agütsüba sentong OKM Mission Vision-2045 tanü Ao Senden Tir Wb.Marsanen Imsong-i meraketa tenzüksüogo.

Ongpangkong Kaketshir Mungdang Inti Mungdang 2024 küm Küpza yimtak amongdang 2025 küm nungi 2045 küm tashi tazüngertem küm shia ongpankong yim balala nungi

shimteta yaritsüta pangzüng takang lemtet aser iba pangzüng dak ajemdaker taküm nungi iba mapatong tenzüker. 2024 küm Ongpangkong yim shia kaketshirtem saru molok saruteper iba senji bendener iba senji amshia iba OKM Mission Vision-2045 mapatong tenzüker.

Tanü iba sentong nung OKM Mission Vision-2045 Luden nung tayonger Wb.Aso Imsong ajanga telok den OKM Mission Vision-2045 nükmnen teratet lemsatep aser pa ketdangsüba nung OKM Mission Vision-2045 Nükmen Kaket Ao Senden Tir

Wb.Marsanen Imsong ajanga sayaja liasü.

Ao Senden Tir Wb.Marsanen Imsong-i jembidang Ongpangkongji Ao kin rongnung yimli nung tebu lir, aser yamaji tanü sentong tajung Ongpangkong Kaketshir Mungdang-i atemzüker asangsang nung inyaka oteter, iba nung yagi memenui Tsüngremi tejang tajung tangtsütsü aser ibaji ongpankong nungeri inyakaka ya Ao kin,Naga kin aser alima rangben atema lir ta OKM dang pelaba ashi.

(Maneni tapak 2 nung...)

Lake View colony hon jubilee mungogo



Honibarnü Lake View colony hon jubilee sentong nung tongti tejaoker Lok Sabha MP, S Supongmeren Jamir-i jubilee nunghilong sayatsüba sülen tangokba noksa nung angur.

Dimapur, Mongputeni/October 25 (TYO): Honibarnü Lake View colony hon jubilee mungogo. Iba jubilee ya "Peace and Well being" omen nung ajemdaker Assisi Higher Secondary School, Lake View colony nung mungogo.

Sentong nung tongti tejaokerji Lok Sabha MP, S Supongmeren Jamir liasü, aser

pai colony küm 50 junga jajayonga aruba indang jembia aser tarutsü yimjiyimjung nung aotsü atema longjemer alitsü aser khuret angatetba lenirtem koda tongtimbang iba indang lemsatep.

Pai sentepa aliba lokti dang, koba ajangasa lokti nung telemang adokdaksür item ajak entoktsü aser colony ajungtsü atema longjemer


inyaktsü ajungshi. Paisa, nüburtem maneni akokba tashi tajungtiba agi tenzüksü nangzükba den pa dang mannei len sayutsü aser pa nongita yaritsü mepeshia liasü.

Maneni pai colony nung alirtem dang Chief Minister Health Insurance Scheme densema sorkar welfare schemes balala takok tashi agitsü ajungshia liasü.

Opang Jamir-i ken tasen ka sayaogo

Dimapur, Mongputeni/October 25 (TYO): Opang Jamir-i October 25 nü pa indang official YouTube channel OpangJamiron nung "Sorojungla," ta nungja agütsür ken tasen ka sayaogo. Iba ken ya November 7 nungi Spotify nunga angutsü.

Pa ya Nagaland nung amendaker aliba kentenba telok Avancer aser pop duo The Twin Effect nung kentener asüba ajanga ajaki jangja lir, aser pai maneni kijai atenba



kentem saya-a renloka odar.

"Sorojungla" ya ken tanep ka aser iba ajanga tetsür tebur ajungba indang jembir. Ken ya

Ao oshi nung atenba ken ka lir. Ken nung "nü tebur ajung agi alima sangwadaksür," ta asüba amala orentem ajanga tetsür tebur ajungba, temeim aser ola tanep agi alima sangwadaksüba indang jembir.

Iba ken ya VitzZhimo-i produce asü, Jongpongtemsu Longkumer-i zülü aser Opang Jamir aser VitzZhimo nati kensü enoka tenogo. Ken indang music video ya Sentilong Yaden-i direct süa liasü.

Ongpangkong Kaketshir saru molok... (TAPAK 1 NUNGI...)



Ongpangkong Kaketshir Mungdang(OKM)-i achayanga shisashirtem nem teyari agütsüba sentong OKM Mission Vision-2045 senpet agizükertem, Ao Senden Tir Wb.Marsanen Imsong aser sentong nung shilem agirtem tangokba noksa.

Ao Senden Tir-isa shisashir ka chichiba nükjidong tongtetsü aser tajung tamajung bendangteta litetsü nungtaker, Tsüngremi asenok nem agütsüba sempet mejangjai beshidang asenoki tamakok angur aser iba mapang nung asernoki tia majunga ta tia nem tongloktür, saka asenok tia ajak ya asenoki yanglur, anungji shisashirtem küm küm aliba shisashirtem ajungshia jembia.

Ongpangkong Kaketshir Mungdang ajanga 2025 nungi 2045 tashiji küm shia yim 2 nungi shisashir shirmok degree balala aser tema azünger

parnok nem iba ya teyari nisung shia sen Rs.50000/- agütsür aser taküm iba senpet Ungma shisashir nungi Sb.Moarenba Jamir aser Mangmetong shisashir nungi Kr.Etidangla tenati agizükur.

Taruba 2026 küm Kaketshir Telongjem aser Meküli Kaketshir Telongjemi nungi kaketshir anati agizüksü.

Sentong nung Tsüngrem taochi leniba jazüka aser iba OKM Mission Vision asoshi Tsüngrem temoatsü jazüka Longkhüm Baptist Arogo Pastor Rev.T.Aka Jamir -i sarasademer sentongren tenzük,iba den OKM Tir Sb.Tongpangmangyang Kichu-

i tarur pela-a agizüka jembia. Ao Kaketshir Mungdang Tir Sb.Lanutoshi Aier aser Ongpangkong Mungdang Tir Wb.Alemtoshi Imsong tenatia tayongzükba o jembia aser anküp o OKM Shisaliok Zülur Sb.Takotiba Jamir-i jembia. Sentong lemladakja Khensa Kaketshir Telongjem ajanga ken tajung ka aten aser tatem nung iba sentong takok ngua agitetdaksüba asoshi Tsüngrem nem tenüngsang agüja Kupa Baptist Arogo Pastor Rev.T.Moa-i sarasadem aser Kr.Molusongla Pongen ketdangzüba nung iba sentong achaayanga agia liasü.

Nov 1 nü Kohima district nung merekmejung sentong alitsü

Dimapur, Mongputeni/October 25 (TYO): Kohima Deputy Commissioner, B. Henok Buchem-i sangdong ka ajanga, Kohima district ajunga nung November 1 (Honibarn) nü 6 ako nungi tenzükba merekmeju sentong ka agitsü ta metetdaksüogo.


Merekmejua alitsü ajungmesotsü, merekmejua alitsü atema khuret angatetdaksütsü aser Kohima District mereka toktsütsü atema ajak longjemer inyaktsü nükjidong nung iba sentong ayongzükogo.

District Headquarters aser Outpost Administrative Officer

ajak, Office tekolak aser staff tem, school, college, institution, dokan aser business establishment ajak den ward, colony, yimtsüng aser nübur ajak dang pei aliba tesem nung iba merekmejung sentong nung shilem agitsü mepeshia metetdaksüogo.

Deputy Commissioner-isa, Kohima District merekmera aser tebur junga ayutsü atema lisopurtem aser stakeholder tem ajaki maneni teyari agütsüba atema pelaba lemsatepba den maneni iba sentong nunga ajaki longjemer shilem agitsü ayongzükba liasü.

Ango ayoker ka pur aoba kümzükogo; aija alir 5 puogo



Dimapur, Mongputeni/October 25 (TYO): October 24 nü 2:35 pm ako meta shishilembar (local ango wholesaler) ka par kidang nungi mejangjaba nisung asemi pur aoba osang angazüka liasü.

Osang agizükba dak ajemdaker meita aoba sentong ka ayongzük aser iba mapang aija alir nisung 5 apu aser parnoki pur aosang ya Dubagaon tesem nungi kümzükba liasü.

Iba inyakim nung amshiba gari dena puogo aser Dimapur East Police Station nung ken o ka benoka tang bushisüngdang tesüdak lir.

Police temi pur alirtem ya G Mech'er jabaso Padumpukhuri kübok H.No 855, Block 3,

Padumpukhuri nung alir SS Tatar NSCN (Wangtin) Antu Mech (30 yrs), Aqhuba yimtsüng nungi Inavi Sumi'er jabaso Lane 4, block 2, Padumpukhuri nung alir SS Rajapeyu NSCN (Wangtin) Nagato Sumi (37 yrs), VK Town nungi Akheto Chishi'er jabaso, Lane 4, Block 2, Padumpukhuri nung alir David Chishi (40 yrs), Pughoboto yimtsüng nungi Yeveshe Swu'er jabaso Diphupar A, Chumukedima nung alir Amento Swu (40 yrs) aser Moirabari yimtsüng nungi Abdul Ali'er jabaso Neisato colony, Khermahal, Dimapur nung alir Ruksana Begum (28 yrs) ta jangjaogo.

Home Department-i metetdaksü

Dimapur, Mongputeni/October 25 (TYO): Home Department-i sangdong ka ajanga, Pfutsero Town Council kübok Ward-11 (Zhipa) atema 28/10/2025 (Mongolbar) nü koba election agitsü ali iba anogo ya iba ward nung E-roll nung züngoksema aliba state aser centre sorkar employee tem ajak asoshi Paid Holiday asütsü ta metetdaksüogo. Sorkar tenzükertem vote agütsütsü atema parnok temeden aliba amshidaksütsü nükjidong nung iba jenjang agiogo.

Kasaji Pfutsero Town Council kübok Ward-11 (Zhipa) nung elector ama züngoksema aliba employees tem shirnok tanga ward nung alir mesüra mapa inyaker parnoka iba election nung shilem agitsü atema soti agütsütsü.

Maneni Negotiable Instruments Act, 1881 (Act, XXVI), kübok election agiba

anogo ya temalen shisema aliba Ward nung elector ama züngoksema aliba Nagaland nung Banks aser Financial Institution tem nung employee tem ajak atema Paid Holiday asütsü.

Ano Nagaland Shops and Establishment Act 1982 kübok Section 10 nung ajemdaker, temalen shisema aliba ward nung elector ama züngoksema alirtemi Pfutsero Town Council kübok achaayangba dokan amala commercial establishment tem election agiba kiyong nung election agiba mapang shibanga atatsü. Elector tem vote agütsüdaksütsü atema iba jenjang agir.

Ajisüaka elector tem kar pa/ la maliba ajanga pa indang mapa nung lendong ataloktsü mesüra takoksa ajurutsü lira parnok iba tetuyuba küboki maitsü.



October 25, 2025 nü Gautam Buddha Nagar district nung Uttar Pradesh Chief Minister, Yogi Adityanath-i tawa Jewar nung yangluba Noida International Airport semdangba mapang tangokba noksa nung angur.

Election Commission-i state 10-15 nung SIR tenzüksü

New Delhi, Mongputeni/October 25 (Agencies): Election Commission (EC)-i taruba hopta state 10-15 shi nung electoral roll tasen atema Special Intensive Revision (SIR) mapatong tenzüksü; item state rongnung 2026 küm assembly election agitsü aliba state tem densema lir, ta Honibarnü Election Commission-i metetdaksü.

Electoral roll yanglushitsü atema SIT mapatong ya sangküm assembly election agitsü aliba state tem- Assam, Tamil Nadu, Puducherry, Kerala aser West Bengal densema

state 10-15 shi nung tama tenzüksü, ta parnoki metetdaksü.

SIR mezüngbuba shilemji taruba hopta sangdongtsü; iba mapatong ya local body elections agitsü aliba state tem nungbo khi lir ang tenzüksü, ta EC-i metetdaksü.

SIT mapatong ya mezüng Bihar nung benok aser aser final electoral roll September 30 nü sangdonga liasü. Bihar nung assembly election shilem ana lemsar November 6 aser 11 anogotem nung agitsü aser November 14 nü vote azüngtsü. SIR mapatong dak sendakba

nung EC-i state balala nungi chief electoral officers (CEOs) den senden anaben ayongzüka menogo aser CEO aikati tesüsabuba voter lists online ajanga lemsatepogo. Delhi CEO website nung tesüsabuba list ji 2008 küm lir aser Uttarakhand nung tesüsabuba SIR ji 2006 küm agia liasü; item list ji online angutsü.

State teimbakati tesüsabuba SIR ji 2002 küm nungi 2004 tsüngda agia liasü.

SIR mapatong benokba tongti nükjidongji ozüng alema arua alir bendangertem maitsü jangjaba sülen voters list nungi agientsü atema lir.

Indianung medical college 387 aliba nungi tangbo 819 kümogo: JP Nadda

New Delhi, October 25 (Agencies): India nung medical college 387 liasü saka tesüiba küm 11 tsüngda medical college aika amenoka tangbo 819 kümogo, ta Honibarnü Union Health Minister, JP Nadda-i metetdaksü.

New Delhi nung All India Institute of Medical Sciences (AIIMS) 50buba Annual Convocation sentong nung jembidang Nadda-i, undergraduate medical seats-a 51,000 aliba nungi lakh 1.29 kümogo aser postgraduate seats-a 31,000 aliba nungi 78,000 kümogo, ta metetdaksü.

Iba dak alia taruba küm 5 tsüngda undergraduate aser postgraduate seats 75,000 tali bendenloksü, ta paisa metetdaksü.

Pai graduate asüba students nem tenüngsang agütsüba den külemi AIIMS-i linük nung medical science, shisaliok aser shirangertem anepaluba jenjang tajungba akümtsü atema kanga junga inyakba asoshi tenüngsang agütsü.

Pai lanur doctor tem dang temeim agi shirangertem anepalutsü aser linük nung healthcare ajungkettsütsü atema tasen purapiteta inyaksü ayongzük.

Nadda-i, "Tanur aser tetsü health tsütsü linük jenjang kanga junga kümogo. Maternal Mortality Ratio (MMR) 130 aliba nungi 88 kümogo aser Infant Mortality Rate (IMR) 39 aliba nungi 27 kümogo," ta metetdaksü.

Under-five Mortality Rate (U5MR)-a shilem 42 ajemogo

asir Neonatal Mortality Rate (NMR) shilem 39 ajema kümogo, aser anapronglaji alima average dang nungi tajungba lir.

Nadda-isa, India nung TB agi shirangertem shilem 17.7 ajema kümogo aser ibaji alima rate 8.3% dang nungi anasü agi teimba lir, ta metetdaksü.

Health minister-isa graduate asüba students dang medical shisaliok aser research nung shilem junga agitsü aser AIIMS tenüng tajung maneni ajungketja pei wadang alakteta inyaksü ayongzüka liasü.

Paisa akümüli piyong tangazükertem asütsü aser tasen purapiteta inyakertem asütsü, medical science ajungkettsüba nung shilem agitsü aser temeim agi loktiliba tenzüksü ayongzük.

MULUNG NEN O

"Ni rara tajung raraogo, Ni alizüng tonga asemogo,
Ni tamangji yuogo." ~ 2 Timothy 4:7



LATE LANUSOBO LONGCHAR
12th May 1930 - 22nd Oct. 2025

Temeim ozü dang ajungertem,

Nenok temeim o agi onok süneptsüogo,
Nenok teyari tulu agi onok tashi itshidaksü,
Aser nenok temeim agidang onok mulung anisüngzük.

Onok mangyim jashi tia nung alidang shirnokisa onok dang meima nübo, rongsen aser sarasadem agi yariogo, nenok ajak dang onoki kanga pelaba mulungnen o ka yangi lemsateper.

Onoki nenok dang tebang agi meshiteta tepela tulu onok mulung nung lir aser aji onoki teti bilemtettsü. Tulusang Tsüngremi nenok ajak talubosa moajangma.

~ Temeim Kinungertem

Benjung mapang Bihar nem special train peria magütsür: Rahul Gandhi

New Delhi, October 25 (Agencies): Centre sorkari benjung mapang nung Bihar nem special trains peria magütsür, ta Congress-i aitsü.

Honibarnü Congress lenir Rahul Gandhi-i, Bihar-i aoba train tem nung nisung masemer aser train tickets angutsü kanga tasak; ainlen lendong majurui sademsadema senzüsüji maongka masü saka temeden ka lir, ta metetdaksü.

"Iba ita ya benjung aika-Diwali, Bhai Dooj aser Chhath amongba ita lir. Bihar atemabo item benjung ya yimsü dak sendakba dang masü saka pei kidangi meyipa aotsü yongyaba mapang ka- pei lima, pei kibong aser pei yimtsüngi aotsü mapang ka lir. Ajisüaka iba teyongyaba ya timtemba mapang ka dang kümdaktsüogo," ta Rahul Gandhi-i X ajanga metetdaksü.

Paisa, train nung passenger tem aika kishi aser kilem nung sanger senzüsüsa akümer aser küm shia tetsürtem jenjang tamajungba dang akümer, ta ashi.

Paisa, Bihar nung mapa maongka mali, ibaji ajanga state nungi aikati mapa bushia

tangaleni aotsüsa akümer, ta ashi.

Osangbenertem senden ka nung Congress MP Abhay Dubey den külemi jembidang Akhilesh Prasad Singh-i, "Bihar nungertem atema Chhath benjung ya kanga tongtibang. Modi aser Railway Minister-i special train 12,000 sangdongba agi nüburtem anisüngzüka liasü saka atangji nungbo train 1,500 dang senzür," ta metetdaksü.

Paisa, "Modi sorkari voters dang tiyazü jembir aser nüburtem tamang den asayar," ta ashi.

Tan hopta tetenzüklen railway ministry-i benjung mongpu atema October 1 nungi November 30 tashi 12,011 special train trips metetdakja liasü. Anogo shia special trains 196 shi dang senzür; October 18 nü teimba (280) senzü aser special train ishiba senzüba anogoji October 8 (166) nü liasü.

Tawa Bihar nung election nüboyim sentong ka nung BJP Tir, J P Nadda-ia, Chhath benjung atema Bihar nung special train 12,000 senzür, ta metetdakja liasü.

Terenlok India yangerba nung lanurtemi tongti shilem agir: PM Modi

New Delhi, October 25 (Agencies): Ato kilonser Narendra Modi-i linük nung lanurtem dang linük nendaka tenzüksü ayongzük.

Video conferencing ajanga Rozgar Mela sentong nung jembidang Ato kilonseri, "Tesüiba küm 11 tashi terenlok India yangertsü atema linüki meranga inyakdar, aser iba lenmang nung lanurtemi tongti shilem agir," ta metetdaksü.

Paisa, lanurtem nem tashi agütsütsüji sorkar atema tongtibangtiba mapa lir, ta ashi. "Taküm Diwali ajanga ajak

nem tesangwa tasen ka agütsüogo, kechiyong Diwali nung osettsüset ayokba kuli ajanga GST Bachat Utsav ajanga demand, osettsüset

yanglutetba aser mapa adokdaksüba sayur," ta pai metetdaksü.

"Alima nung lanurtem teimba aliba linükji India lir aser lanurtem tashiji linük atema senti. Iba tangatetba nung asenok lenla ajak tsütsü tejakleni odor. Asen linük foreign policy-a lanurtem dak rangloker yanglur. Tangartem den tezüngzüktep balala yangluba-a lanurtem nem training agütsütsü aser mapa adokdaksütsü nükjjiong nung rangloker inyaker," ta paisa metetdaksü.

Linük tesem balala nung Rozgar Mela kübok tang tashi nung mapa nung shimokba shidi lakh 11 dak tali agütsüogo, ta paisa metetdaksü.



October 25, 2025 nü Meerut nung Central Market Complex bendoktsüba sülen police aser security sepaitemi iba tesem anükba noksa nung angur. Supreme Court tetuyuba nung Housing Development Council-i iba Complex bendoktsü.



TIR YIMYIM YIMOBILEM (EDITRIAL)

DIMAPUR SUNDAY, OCTOBER (MONGPUTENI) 26, 2025

Teshisadang liang

Asenok dak aliba tekolok aser temulungjang nung ya tashi tuluka lir. Iba tekolok aser temulungjang amshia asenoki tajung o tamajung na bendangtettsü. Aji oda, asen dak aliba kolok aser temulungjang ajunga agi Tsüngremi mulungba mapa inyaktsüsa renemtsübaji asenok nisungtem atema kanga tongtibang lir. Asenok mulung nung Laishiba tekong aika rizünga yur anogo shia iba jagi asen taküm len anidaktsütsü akok. Aji oda, asen kolok agi Tsüngremi yanglubatem kechisarina indang shisadanga Pa tashi aser taochi angatettsü merangba mapatemji asenok atema jangratemtsü mapatem lir. Atangji, asen taküm aser kibong raksatsü aser yanglutsübajia aseni asen kolok aser asen mulungjang nung renemba dak keta lir. Asenoki asen kolok aser temulungjangji tamajung mapa inyaktsü indang bilema renemra asenoki mapa tamajung inyaktsü, anungji asenokji nisung tamajung asütsü. Aji oda, asenok ya akhidang Tsüngrem memetetba mapang jabujaria aliba taküm aser kibong ama mesüi, Tsüngrem den tashi angaa jajaba takümtem asütsü asoshi " asenok temulungjang aser tekolok jungjunga renemshir, shisadanga Yisu Khrista dak dang teimla yur akangakanga amanga liang," ta 1 Peter 1 : 13 nung shia lir. Iba Laishiba tekong nung asenok dang temulung nangri akangtsü ashiba tetetzüji asenok temulungjang renemtsüba indang ashir, aser maparen ajak nung teshisadang alitsü ajungshir. Asen nem tekolok aser temulungjang agütsübaji bilemdanger tajungba jembitsü aser inyaktsü asoshi agütsüba lir. Ajisüaka, asenoki aiben asen taküm aser kibong nung Tsüngrem taochi indang mebilemdangi mashi mashi jembir aser inyaker. Idangji, asenoki Tsüngrem dang masü saka asen adianu aser medemertem jashidaktsür. Aji oda, asenoki aiben tanur ama meshisadangi inyakba ajanga asenok taküm nükjidonga matonger. Ibayongji, tenyar Pauli tamangertem dang joko tanur asüba mapang bilemba aser inyakba amato masü, saka tain amato shisadangtsü aser inyaktsü 1 Korint 13:11 nung ajungshir. Aji oda, tenyar Pauli tamangertem dang, temulung nung tanur tesü saka tebilemdangba nung tain süang ta Korint 14:20 nung ajungshiba angur. Tenyar Paul mapang tamangertemi tanur ama dang bilem aser inyak. Ibayongji, aiben parnok rongnung mangatettep adok. Tanuri pei bilemba dang shitak amato bilemer. Tanuri tarutsü indang mebilemer. Tanuri tamalen inyakba mapatem amadoker. Tanuri peisasa yirutsüsa inyaker aser tangar a yirutsür. Tanur shisatsü nung taaktsü maket aser parnok kolok nung khuretsa bilemba shisatsü mali. Item tanur shisatsütemji kodang taintem dak lidir, iba jagi meputep adokdaktsür aser tanüla mapatem dena takok ngua meinyaktetter. Tanü asenoka tain ser nung tanur ama bilemba purtem jenti lir. Ibayongji, yimten, arogo aser lokti tipdema anir moutetter. Tain ser nung asenok kolok aser temulung nung kibong, yimten, arogo aser lokti atema tebilemstü kaa shisadangba mali. Asenok tebilemstü aser khuret tangar nem bendaktsür. Tanüla tsütsüa asenoki tanur ama tangar dak dang imlar. Asen taküm aser kibong asoshi tangar nem dang shisadangdaktsür, tangar nem dang sarasademdaktsür aser tangar dang dang asenok tia asüngdang. Tsüngrem o bushiba nunga asenok asoshi tangar nem Laishiba bushidaktsür. Adianutem, itemji tanur yimya memesük no ? Iba ama tanur ama bilemba aser inyakba nungi asenok tain maküm tashi asenoki Tsüngrem sentsüwangshidaktsütsüsa kecha meinyaktetstü. Alima nung tapu tapu ataloktsü aser tapu tapu jembitsü, idangji asenoki tanur ama bilemra asenok aoksatsü aser akoksatsü. Iba ama tensa nung asenoki asenoksasa nokdaktetstüsa, Laishibai ashir, temulung nung tangatetba akanga liang aser teshisadang liang .

OLEMSABANG

SHITI -THE LETTER

~ Marnungtet Ozukum

(Iba Yimdangjem otsü ya Tir Yimyim aser Bookipedia nati ayongba toktep nung mezüng takok jenjang anguba liasü.)

(Yashi adok nungi...)

Lai kechiba küdang mashi?lai shiti ka ajanga tang osang yoktetsu masu no?lai-a kechiba küdanga mashi iba Tashi inyak?. Iba ama tasüngdangba jenti lia aser ku temulung nung kanga jashia kidangi meyip.Saka ni jashiba shiba tang koda lemsateptsu memetet,la tali ni menungra,la ajurutsu asoshi yonyar aser osang shiti katang-a la aser lar kibong kechi timtem ali item amala zulur arur nunga ta yonyaseta anogoshi shitibener nisung senzübaji teimla nungsa repranga ata amen.Anogo agi septa melener,septu agi ita melen saka osang kecha maru aser kü temulung nung teimla ajak sama akum.

Class 9 tatidang aru saka ku tekolok nung la tebilemba shisatsü tuluba alinung ni lesson junga mebushitet ,iba den kulemi ni kaketshir tajung ka masü.Anungji result adokdang ni fail asütsü ta bilema result reprangi mao saka tesüngmangtsüka ni pass sua lir ta medemer dak nungi osang aru.Tatitang mapang Atula menungra bilemba shisatsü agi sünger lesson azüngba nung temelung magütsütet saka pass asübaji ni asoshi tepelatsü.Taruba kum class 10 nung amen saka kü temulung tepela ka mali ,tejashi agi sünga lir,kidang maka mait ulura aser ojala shisabulua aliba temulung agi metizüker,ni kaketshir tajung ka masü ,iba denano Atula menungrar aser tesüdang alur,iba ama temeyoktep shisatsu tebenja agi sunga lir.Ojalai teti "Temeim nung meim lir " ta shia tedongteji aser kibalembu kümdanga shimtsü sayuba O yimdangi arua Temeim nung meim lir ta asüba tali rajem ,kechiaser ni Atula temeim nung meim chisemer tepela mali aküm..Ni iba küm kü-sasa tazüngba nungi anena adok aser yimdaki shilanga alu.

Joko ni tain akumer,saka ni kidangi kecha aazüka bener maruteter,kidang sentsü agi nungbanger aser kuno azüngtsu asoshi ojala küna khuret tulu.Iba ama maka mait tia aser ano tesuiba tatalokbatem bilemtetang tejashi agi asünger mepelateter .

Kenü anogo ozü kidanger okola Nokinba tangi ni atu,pa ya tebuttsü tena palar sülen pa telungi ai aser pa tesangra shisatsü aliba ajanga pa tanshir küma inyakba nisung.Ni ajitetba agi pa telungi aiba külen nungi par ki tajungba aser libaliru tebrang takaba akümer.Küna sensaksema amendang ni pa tang ashi

"Okoni telungi aitsü jangrar nai küdang lenmang sayuang"

"Na kechiba telungi yiner aser telungi aiba nukjidong meteta lirma?" pai asungdang

Telungi aiba nukjidong ni memetet,iba telok kechi asoshi tentet memtet ,Naga nuchiso asoshi bushir tabu angazük saka kü tenuki anguba agi yi ajemer, mozü achir, tazüngba nungi zungdor anenertem,tsuraburtem den jashiteper telungi aika aier,ni-a item rongnung ka; azüng zulu memetet aser tejashi agi sünga aliba nisung ka.Ano talisa telungbur tanishir tem jangratema lia angur aser pei kinunger adianutembu government mapa exam magütsüi tang angur.Item kuli ya ngua k? taküm tepela,rongsen angutsü aser taküm tia tajungba akümstü südi ta tebilemba nung ni tulungi aitsu jangrar.

Ni item tebilemba aser nükjidong Okola Nokinba tang rasa mashi saka ;

"hau ni meteta lir "ta langzü.

Pai küdang telungi aiba nükjidong rasa mashi,pa kanga tongmelang nisung.Anungji pai ni meteta lir ta anagetet südi.

Anogo pungushi lir pai par kidangi ni jaket ;

"Na tangnungsa Mon district aotsu,idakji station nung na nisung anati atatar asutsu iba sülen parnok na tesem kati anir aotsu idakji na training ita ana shi agitsu,iba sülen na asoshi mapa ka lir iba mapaji nai inyaktetra na tulu mendeni okola teyarir ajanga ajungketsütsüJungshi,nai iba mapa inyaktsü mulunger sudi aser aremstü südi ?" pai küdang kanga nendaka ashi .

"Hau ni mulunga lir aser aremstü "ni langzü

Okola Nokinbai ashiba ama ni apusoa Mon-i ao.Ojala tang iba sentong kecha meshi apuso.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran nung Khristan ka kûm ana jail nung puokba sülen chiokogo



Mina Khajavi

October 25, 2025: Iran nung arrshi kûm 61 Khristan tetsür ka kûm ana jungnüa jail nung puokba sülen tawa chiokogo. Iran tsür Mina Khajavi lendong ka nung yiruba sülen temang ayangashia dang alir. Yaftabad district nung house church ka nung shilem agiba agi 2020 kûm la pua liasü.

Khajavi-i house church ka nung shilem agiba ajanga lai linük security anema inyakogo, ta aija la kûm trok jail nung puoktsü obendang agüja liasü. Ajisiüaka la gari kati menünga agi surgery akümtsüsa akûm, ibayongji la anema agütsüba obendangji atsülanga liasü. Ajioda la surgery agia temin

nung merang inoka liasü. La jail nung aliba mapang nung la nem medical teyari junga magütsü saka khenkhen dang la nem painkiller mozü agüja liasü. 2022 kûm la den külemi Malihe Nazari naprong kûm trok tepuokdak ayutsü obendang agütsü aser Iranian-Armenian pastor, Joseph Shahbazian kûm 10 tepuokdak ayutsü obendang agüja liasü. Tesüsa Hombarnü (October 20) la (Khajavi) Iran yimtiba, Tehran nung aliba Evin jail nungi chiokogo. La tamalen jail nung puokba züngsemabo la jail kümsük abensaago. Church in Chains teloki ashiba agi, 2020 kûm ketdangsertemi Tehran, Karaj aser Malayer nung house churches aika mita oa liasü. Iran nung Armenians aser Assyrians ama lisopur Khristantembo ozüng kübok kûmzüker, ajisiüaka Islam yimsü toktsür Khristan yimsü agizükertemibo reshikangshi kanga ajangshir.

Alima nung yimsü temeden jenjang tamajungba dang akümer

October 25, 2025: Alima tesem balala nung tamangba yimsü jenjang amokmeren nung lir, aser tamajungba dang akümer, ta Aid to the Church in Need (ACN)-i metetdaksü. ACN indang Religious Freedom in the World 2025 report ajanga ashiba agi, tang alima nung nütsüng shilem asemsü nungi shilem anasübo (2/3rd) yimsü temeden maliba mesüra tenokdangba aliba linüktem nung alir; iba nütsüngji billion 5.4 lir. ACN-i linük 196 asadangba nungi linük 62 nungbo tamangba yimsü temeden khenyongi maliba bushitet. Linük 24 nung reshikangshi lir aser linük 38 nung tamangertem bendangshidanga züngshir. Tesüsabuba report agütsüba sülen Kazakhstan aser Sri Lanka na nung dang yimsü temeden jenjang tera tajungba kûmogo. ACN International Executive Tir, Regina Lynch-i, Universal Declaration of Human Rights nung Arrla 18 kübok agüja aliba yimsü temeden amokmeren jenjang ka nung aliba dang masü saka linük aika nung yimsü temeden tamajungba kûmdar, ta metetdaksü. Talisa kijai tashi amshiba sorkar aliba linüktem nung yimsü temeden jenjang kanga mejungi lir. Ano reshikangshi mesüra tamangertem bendanga züngshiba linüktem aika nung sorkartemi

tamangertem mita repranger mesüra ola madoker. ACN report ajanga, "Yimsü azüokba ya yimtenren tsütsü hadir ka ama amshir. China, Iran, Eritrea aser Nicaragua linüktem nung yimsü kanga azüoker," ta metetdaksü. ACN nung yimobilem zülur, Marta Petrosillo-i, iba study nung Khristantem dang masü saka tanga yimsü amangertem jenjang-a asadangogo, ta metetdaksü. Laisa, linük aikati yimsü temeden kûmzüksü sangdongbaji tema nung sayuba temaitsü ka dang lir, ta ashi. Tang alima nung talisa Africa kübok Sahel region aser Asia tesem balala nung ozüng alema inyakba telok balalai tamangertem nem timtem agütsür. IS-Sahel Province (ISSP) aser JNIM ama Islamic State teloktemi Khristantem amakba den külemi Tenla ki aser school aika raksatsür, aser item tatalokba ajanga nisung million aika jenshiogo. India aser Myanmar nung mapang shia loktii Khristantem aser Muslim nungertem amaker. Nigeria nung Fulani ama telok balalai Khristan yimtsüngtem amaker aser Sudan, Palestine, aser Ukraine linüktem nung rara ajanga yimsü temeden jenjang tamajungba kûmogo. Mexico aser Haiti ama linüktem nung ozüng alema inyakba telok balalai Arogo

nung lenirtem puer aoer mesüra tepseter. Europe aser North America tesem balala nung Tenla kitem raksatsüba mesüra amakba tatalokba kanga bulua kûmogo, ta ACN-i metetdaksü. 2023 kûm kija nunga France nung Tenla ki amakba tatalokba 1,000 jungnüa liasü aser 2023 kûm October ita tetenzüklen Hamas teloki Israel amakba sülen Europe tesem balala nung Yihuda nunger aser Muslim nungertem anema inyakba tatalokba aika liasü. Lynch-i, "Meimchir ka pei tangatetba nung alitsüji meimchir akhümket ka lir. Meimchir tsüngda akhümtsübutep alitsü, yimjung alitsü aser ochi temeden alitsü nüngdak. Ajisiüaka item temeden nokdangba tesemtem nung loktiliba ka tamendakdak samar," ta metetdaksü. Laisa, "Yimsü temedenji meimchir temeden ajak rongnung tongtibangtiba. Iba temeden jenjang tamajungba akûmba ajanga temeden ajak chireptsü temaitsü sayur," ta ashi. Vatican nung iba report sayaba mapang nung ACN-i alima nung reju balala dang yimsü temeden kûmzüksü atema ozüng akangshitsü ayongzük. ACN-isa alima tesem balala nung 'petition' ka tenzüksü aser November ita nung iba temepishibaji United Nations, European Union aser democratic sorkartem nem agütsütsü.

ANOGO ABEN TSÜNGREM DEN

KEN SHISADANGDI!

"Tsüngremer taochi tapu balala ketdangsürtem tajung ama nenok shiai sempet kaka agiz?ka alibaji kati ka asoshi amshiang." 1 Peter 4:10 Peteri amangbapurtem dang iba shiti ajanga ajungshibaji; Khristantemibo alima aser idakji aliba den sütepa, hai haura katepa aser item invakyim nung ha mejajatsüla. Saka asen nem agüja aliba sempet ajakji Tsüngrem nungi aser Pa sentsüwangshidakja tajangzik lenmang nung kati ka asoshi tajung inyakteba, kati ka dang ajungshiteba nung amshitsü indang ashir. Tanü asen putu reprangra ali meimchir joko kija dang linüba, ajangzüknüba putu ka kûmogo. Ajaki pei ajung aser tajangzük asoshi dang bilema asameyanga sentonger, arok aser tangar ajungtsü asoshi mebilemba putu ka tanü asenok kûmadokogo. Adianu tajungtem, Pei takûm aser pei kibong asoshi mazüngi dang inyaktepba nungi minute ishika anena atar ken jung junga shisadangdi. Tsüngremi moatsüba takûm peyong pei takûm aser pei kibong asoshi dang bilema inyakba jagi asen takûm aser kibongi Tsüngrem sentong ataloktsür asü masü? Kanga sarasadema bilemdangdi, kechiaser teyanglur Tsüngrem sentongbo ibaji dangbo masütsü südi.

YouVersion-i Lai azüngba sentong ka ayongtsü

October 25, 2025: Alima nung YouVersion CEO, Bobby Gruenewald-i, "Laishiba azüngertem teimba-teimba dang akûmba kuli onoki angur, aser iba tatalokba nung shilem agitetba atema onok nûma atanger. Anogo shia takûm aika melenshiba otsü onoki angashir. Kari temesepba mozü toktsür, kiyimba asentenshiba otsü angashir aser tang mezüng aikati pei oshi nung Laishiba züngteter," ta metetdaksü. Global Bible Month campaign ya Glorify, Hallow aser The Bible Project ama Khristan platform balala den ayongteper agir. 30-Day Bible Challenge nung Bible app amshirtem dang anogo shia Lai azüngtsü mesüra Lai angatsü ajungshir. Tatembangbuba sentong nung Phil Wickham, Lauren Daigle aser Brooke Ligertwood nungeri ken atentsü aser Craig Groeschel aser Christine Caine na densema Khristan lenirtem aikati o jembitsü.



Mokokchung Baptist Arogo kübok Antiok Mission Board-i yaria Mokokchung yimdak teintet rogotem asoshi wara-shira nungi kûmzüka alitsü atema vaccination camp (FLU vaccine) sentong ka 25th October nü ayongzüka akaba mapang tangokba noksa nung angur.)Mokokchung, 25th October, 2025)

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tom

(adj) tetsüingda, ano matong (middle part, on the way)

* Onok lenmang tom nung lia osang tamajung angashi.

Tomta

(adj) tetsüingda mapang (interval)

* Lokti senden tomta ka nung chi chiyongtsü metetdajtsü.

OLONG PAITEP # 7310

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba

-(8)

6. T _ _ _ em

-(3)

8. Tzüik ayudak

-(3)

9. Nüingdakba dang timba

-(6)

11. Züina ao

-(4)

12. Yangi tzü angur

-(5)

14. Tangar dang nungi tali

-(4)

16. Senyong masü

-(6)

17. Oadokdi

-(3)

18. Tzü tarok

-(3)

19. Yimtaklir aikati iba ya ki den

külemi yanglusemer

-(8)

LANGTSÜNGLEN

1. Temejangdak

-(6)

3. Nisung ka mapa inyaksü nübo

-(4)

4. Azüintsü asoshi mejemba

-(6)

5. Tesangwa agütsüba

-(5)

7. Tila masü

-(4)

10. Tebenjem tetsür chanu

-(4)

11. Tekolak nung inok

-(4)

12. Tetsüingda

-(6)

13. Tangar inyakba ka inyak

-(6)

14. Tim masü ta ashi

-(5)

15. Asalendong

-(4)

16. Tanü dangtsü

-(4)

OLONG PAITEP # 7309 TELANGZÜBA**TIPIEN :**

3. Auya, 5. Tekoro, 7. Yong, 8. Mata,

10. Asen, 11. Anentsü, 12. Lisü,

13. Ak-ki, 15. Ajak, 17. Indang,

18. Okar.

LANGTSÜNGLEN :

1. Atema, 2. Komo, 3. Aong,

4. Yongsük, 6. Tsüing, 7. Yanü,

8. Molung, 9. Tasazük, 10. Asak,

14. Kanga, 15. Apir.

NAI-A YA METETTER**2,831 KMS COVERED****IN A SINGLE TANK OF DIESEL**

Czech Republic nung car company Skoda-i Guinness World Record ka yanglutetogo. Parnoki yangluba luxury sedan Superb ajanga "Greatest distance driven on a single tank of fuel" otsü yanglutet. 2025 European Rally Championship winner Miko Marczyk-i tawa tu iba gari nung totzü sünga enoker kilometer 2,831 tashi oteta liasü.

Superb diesel ajanga 100 km shia nung 2.61 litres dang aronger aser iba ya 90 mpg mesüra 38 kmpl shi lir ta Skoda-i metetdaksüogo.

Miko Marczyk-i France nung record drive asü dang 107 mpg mesüra 45 kmpl tongteta liasü.

Mirabai Chanu-i Manipur Governor Bhalla den ajurutep

Mirabai Chanu-i Manipur Governor Bhalla den ajurutepba noksa nung angur.

Imphal, October 25, 2025

(Agencies): Manipur nungi Olympic weightlifter Saikhom Mirabai Chanu-i Governor Ajay Kumar Bhalla den ajurutepa saisapongba dak sendakba onüktem lemsatepogo.

Hokolbarnü Raj Bhavan, Imphal nung Chanu-i Manipur Governor den ajurutep aser saisapongbaren aser talisa weightlifting atema tebilembatem lemsatep.

Tena ajurutepdang Governor Bhalla-i Chanu dang takok tulu

ngua aruba atema tenüingsang agütsü ta Raj Bhavan sangdong ka nung ashi.

Manipur nung saisapongbaren tsütsü lenmang sadema lir aser lanurtem dak saisapongtsü sempettem keta lir. Tarutsü champions anitettsü atema sports infrastructure tashi itdaksütsüla ta Chanu-i ashi.

2020 Tokyo Olympics nung Mirabai Chanu-i Women's 49 kg category nung silver medal nguteta liasü.

Manipur State sorkari la state

home department nung Additional Superintendent of Police ama mapa nungi anioka liasü.

Arishi küm 31 tain Saikhom Mirabai Chanu nem October 19, 2025 nü special award ka agüja liasü. Manipur asoshi konang bentsür aruba aser lai bendanga agütsüba aser sempet ajanga lanur aika ajungmesoba atema iba sempet agüja liasü.

Manipur Police indang 134 buba Raising Day nung la nem iba sempet agütsü.

India-i Myanmar nung drone strike asüba aitsür: RPF**Imphal, October 25, 2025**

(Agencies): Indian Army-i October 20, 2025 nü East Konyak Region, Myanmar kübok Khenmoi-Loiyi (Khammol) yimtsüing nung drone strike aitsür ta Manipur nung Revolutionary People's Front (RPF)-i metetdaksüogo.

RPF ya ozüing noktanga aliba People's Liberation Army (PLA) indang political wing lir.

Iba lendong nung civilian ana- arishi küm 27 tebur ka aser arishi küm 8 tanur tetsür ka tepsetba den nisung pezü kanga mejungi yirutsü.

"Lendong nung asür ana atema mang ayimer aser yirua

alirtem pusema nungiter" ta Deputy Secretary of Publicity, RPF Roben Khuman-i ashi.

Indian drone strike ya lapi mapa aser genocide o war crime ka liasü. Telungpur atema inyaker ta ser civilians tepsetba ya Indian army atema tanü tasen masü ta Khuman-isa metetdaksü.

Western East Asia nung Indian army-i civilian tem anema inyakbaji Rose aser Manorama tatalokba ajanga jangjashitsür. Tangbo India-i civilian tem tepsettsü atema drones amshir ta paisa ashi.

Artsü alemer Naga civilian tem amakba ya international

humanitarian norms aser human decency alema inyakba lir. 2025 tetenzüklen Indo-Myanmar arrtsülen Indian drone operations aser cross-border strikes inyakogo, ta Khuman-isa metetdaksü.

Western Southeast Asia region nung aliba civil society aser human rights teloktemi iba tatalokba ya international human rights aser humanitarian organizations nem metetdaksütsü ayongzüker. United Nations den sendaktepa aliba teloktem dangia abentsüla aser October 2025 strike atema bushisüingdang asütsü rongshitsüla ta paisa ashi.

Mizoram nung ozüingalema arur aser ILP malirtem agientsü**Guwahati, October 25, 2025**

(Agencies): Mizoram sorkari ozüing alema arurtem aser permits tejangja maliba non-tribal nisungtem aniener ta Chief Minister Lalduhoma-i ashi.

Sakawrdai nung Young Mizo Association (YMA) general conference nung jembidang CM Lalduhoma-i "iba onük ya Prime Minister Narendra Modi aser Union Home Minister Amit Shah na den jembiogo" ta ashi.

"Asen Governor nungi temelaba anguba sülen ni prime minister aser union home minister na dang eviction drives agitsü sentong lemsatepogo. Mizoram nung Inner Line Permits (ILP) medeni non-tribal nisungtem dak tenük yoka iba mapa inyaksü. Aizawl kübok tesem kar nung iba ya inyakdar" ta pai ashi.

CM Lalduhoma-isa central YMA leadership den ajurutepa



Lalduhoma

ozüing alema arurtem agientsü atema amalitepa yariteptsü jembiogo.

ILP system ajanga Mizoram telungi bendangertem aruba noktanger. Iba ya lisopurtem aser parnok ali kümzüka ayutsü atema Bengal Eastern Frontier Regulation (BEFR) of 1873 kübok tenzüka lir ta

Lalduhoma-i metetdaksü.

State sorkari online ILP system tenzükogo aser iba ya ozüing alema arurtem noktangtsü atema lir. YMA, local councils, aser village authorities-i ozüing alema arurtem noktanga nung yariteptsü mepishir ta paisa ashi.

Thailand chuba tetsü Sirikit arishi küm 93 nung süogo



Tetsür kati Thailand chuba tetsü Sirikit aiewa tangokba noksa ka amer tangokba noksa nung angur. Chubatsür Sirikit Bangkok, Thailand nung King Chulalongkorn Memorial Hospital nung asüba osang angazükba sülen mangyimertem adenshia liasü.

Bangkok, Mongputeni/October 25 (Agencies): Taoba chubatsür aser Thailand chuba Maha Vajiralongkorn tetsü Sirikit arishi küm 93buba nung süogo. Sirikit ya Thailand talangtiba yimsü asüba chuba asür Bhumibol Adulyadej kinungtsü liasü.

"La temang Hokolbarnü tashi nung tamajungba aküm aser 9:12 pm nung Chulalongkorn Hospital nung arishi küm 93buba nung süogo," ta palace sangdong ka ajanga Honibarnü metetdaksü.

Sirikit ya chuba Bhumibol kinungtsü liasü, shibai Thailand küm 70 yimsü asüba sülen 2016 küm asü.

La ya azü infection asüba sülen October 17 nü nungi temang mejungi aruogo. La indang medical team-i takok tashi merangdangogo, saka la tema tajungba maküm, ta osang ajanga metetdaksü.

Sorkar otongdar kati ashiba

agi, Thai Ato Kilonser Anutin Charnvirakul, ASEAN lenirtem summit nung adeni Malaysia-i Honibarnü aotsü liasü saka, Chuba tetsü asüba ajanga iba sentong athitsüsa aküm.

Iba melena Thai lenir yagi asüpila sentong atema cabinet senden-ang ka ayongzüka agi.

Ato Kilonser Anutin Deobarnü Malaysia-i aotsü ta sorkar sangdong ka ajanga metetdaksü. Kasa anogo Thailand aser Cambodia na yimjung atema tenangzüktepba nung sign asüba sentong nung US Tir Donald Trump-i shilem agitsü.

Chuba Vajiralongkorn-i sangdong ka ajanga, tetsü asüba anogo nungi küm ka chubaer kinungertem aser kilirtem mang ayimtsü ta metetdaksüogo, ta Thai PBS media outlet sangdong ka ajanga metetdaksü.

La kinungbo aser jabaso shiba dang chuba lir, tenati la amokbang, saka Sirikit ya

nüburtemi kanga meima aruogo aser la asoba anogo August 12 nü ya Mother's Day ama munga arudar.

2020 aser 2021 küm kaketshirtemi anir cuba anema aser chuba ozüing agintsü khanga longkak aítba mapanga par tsürapurtembo kangabo maitsüi liasü.

Sirikit ya 1932 küm Bangkok nung takar aser aristocratic kibong ka nung aso. Iba küm Thailand nung Chubai dang ajunga yimsüsüsa aliba constitutional system agi melena liasü.

La aser Bhumibol na 1948 küm Paris nung ajurutep aser 1950 küm April 28 nü kibong aküm.

Sirikit nem Somdet Phra Nang Chao Sirikit Phra Borommarachininat title agütsü. Tena Jala jabaso pezü lir; chuba Vajiralongkorn, chubatsür Ubolratana, Sirindhorn aser Chulabhorn.

South na tesendaktep achaayanger pai ashiba agi, Asia-Pacific Economic Co-operation (Apec) forum atema Trump-i South Korea semdangba mapang lenir ana ya ajurtuteptsü akok, ta AFP sangdong ka ajanga metetdaksü.

US ketdangsür tejen kati osangbenertem dang ashiba agi, lenir ana ajuruteptsü atema Trump indang mapanglem nung mali, ajisüaka lenir ana ya taoba mapanga Trump-i social media ajanga jaokba sülen demilitarised zone (DMZ) nung ajurutepa liasü.

Trump mezüngbuba Malaysia nung anentsü, kong pa Association of Southeast Asian Nations (Asean) summit nung adentsü.

Ano pa Bodhbarnü Apec summit atema South Korea kübok Busan yimti-i aotsü. Pai South Korea lenir Lee Jae Myung den ajuruteptsü, shibai Korean peninsula nung yimjung atema sensak asemer.

SANGDONGER

Longjakrep Semchir Telongjem ajanga Longjakrep Semchir Tera (Lirem Kaket) ta sür 1st Edition 2022 nung adoka lir. Iba otsü committee nung mezüingbo ni convener liasü, saka timtem adoka ni iba committee nungi atsüingin. Saka iba kaket nung nisa convener ta adoka lir. Anungji iba otsü kaket adokba ya ni memetet aser ni maden ta sangdonger.

Sd/-
T.Akum Jamir
Longmisa.

Russia-i Ukraine nung ano nisung 4 tepsetogo

Kyiv, Mongputeni/October 25 (Agencies):

Russia-i mssile aser drone amshia Ukraine amakdang nisung pezü tepset aser aika yirutsüogo, ta local ketdangsürtemi metetdaksü. Kyiv den sendaktepa aliba linüktemi Moscow anema jenjang agitsü nongshiba mapang tang iba ya atalokogo. Ukraine yimtiba Kyiv ballistic missile ka agi amakba sülen nisung ana tepset aser nisung teku yirua liasü, ta yimti indang military administration tekolakba Tymur Tkachenko-i Honibarnü metetdaksü.

Ukraine indang State Emergency Service-i ashiba agi, missile yokba sülen nisung maliba ki ka nung mi adok aser ano missile teraksa tanga tesem ka nung moapu nung tsük, saka iba janga iba anasa aliba kitem kichiba raksaja liasü.

"Linük yimtiba ballistic missile agi makdar," ta Mayor Vitali Klitschko-i social media post ka ajanga metetdaksü.

Dnipropetrovsk tesem nung acting Governor Vladyslav Haivanenko-i ashiba agi, nisung ana asü aser nisung tenet yirua liasü. Paisa, iba tesem amakba sülen apartment building, nisung aliba nija kitem, outbuilding ka, dokan ka aser gari ka raksa liasü, ta metetdaksü.

Asürtem rongnung kabo emergency worker ka liasü, ta Ministry of Internal Affairs-i metetdaksü. "Dnipropetrovsk kübok Petropavlivska tesem tanen makai amakba sülen tekümsüker ka tepset aser ano tanga ka yirua liasü," ta ministry-i social media ajanga metetdaksü.

Ukrainian Air Force-i ashiba agi, Russia-i Iskander-M ballistic missiles 9 khaloktsü aser drone 62 yoka liasü. Ballistic missile pezü aser drone 50 bo khazüka yokogo, ta kasa sangdong ajanga metetdaksü.

Iba tatalokba dak sendakba nung Russia-i kecha telangzüba magütsü.

Kasa mapang nung Russia-ia, local reservoir ka nung dam ka amakba atema Honibarnü Ukraine aitsüogo. Telegram ajanga Belgorod tesem Governor Vyacheslav Gladkov-i ashiba agi, iba dam aiben amakba ajanga dam pokdanga tzü metsüing arutsü ana nung lir aser Shebekino aser Bezlyudovka nung alirtem dang khen atema ki toktsür aotsü tetuyuba agütsüogo.

Belgorod tesem ya Ukraine kübok Kharkiv den arrtsü nung lir. Iba tesem ya taoba mapanga Ukraine-i makogo.

Russia indang Ministry of Defence-i ashiba agi, ajak senteper parnok indang air defence-i manger mesangwa

tsüingda Ukraine nunger indang drone 121 khazüka yokogo.

Kyiv pusemba anüolen aliba linüktemi Russia tali nongshiba mapang ka nung tang iba ya atalokogo. Linük ana rara tenzüker asü kwa pezübuba ajangshia aotsü lir.

United States aser European Union-i, Russia indang energy dak sendakba nung tenokdangba talila agütsüogo, koba Moscow rongsenketzüing tashi meiti kümdaktsütsü nükjidong nung agiba lir.

US Tir Donald Trump-i, ceasefire benoktsü atema Moscow nongshitsü asoshi Bodhbarnü Russia indang oil firm tongtibangtiba ana; Rosneft aser Lukoil na nem tenokdangba agütsüogo. Kasa mapang nung EU-i Brehostibarnü Russian energy exports dak sendakba nung tenokdangba agüja, liquefied natural gas import asütsü nokdangogo.

Hokolbarnü "Coalition of the Willing" ta nüngja agütsür aliba telok London nung senden amenba sülen osangbenertem den sensakemba mapang Ukraine Tir Volodymyr Zelenskyy-i, tenokdangba balala agütsüba pelashishia agizükogo aser Russia indang toztü ayokba company ajak talila nongshitsü ayongzüka den Ukraine indang long-range missile capabilities tajungba kümdaktsütsü atema military teyari meshia liasü.

Honibarnü Zelenskyy-i ashiba agi, Russia-i parnok tali amak tenzüka sülen air defence system tali nüngdaka kümogo. "Iba amai onok amakba ajanga onoki yimtittem kümsüka ayutsü asoshi Patriot systems tali nüngdaker. Asenok tawa sensaksemba ama partner tem shirnok ket nung tashi lir parnoki onok nem teyari agütsütsü kanga dang tongtibang," ta pai ashi.

Kasa mapang nung Russia Tir Vladimir Putin-i, anüolen aliba linüktemi pa nongshiaka pa azüa malutsü, ta shiogo.

Putin-i, Ukraine disarmament aser Russia-i rara nung atsüner aliba tesemtem ayutsü takhangba agütsüogo. Iba takhangba ya Ukraine-i khenyoni magizüker.

Trump aser Putin na ajuruteptsü atema sentong yanglua aliba iba hopta chirepogo, kechiyong US Tir-i ceasefire ka benoka rara tembangdaksütsü benoka liasü.

Tang mangatetep adoker liaka investment & economic cooperation atema Putin indang special envoy Kirill Dmitriev-i Hokolbarnü ashiba agi, ken o bentettsü ana nung lir ta amanger.

XXVII buba MDFA Trophy 2025 Doyang Strikers-i benogo



Doyang Strikers-i 27th MDFA Trophy 2025 koker senpet agizüka pelatepdang tangokba noksa nung angur. Mokochung, 25th October, 2025

Mokokchung, 25th October (TYO): 14th October nungi tenzüka Imkongmeren Sports Complex, Mokochung nung 27 buba MDFA Football Trophy 2025 asaya-a arur, tanü tesüsabuba Doyang Strikers, Mkg o Chargers FC na asayaba, Doyang Strikers-i goal 2-1 agi Chargers madak takok tulu ngua taküm iba asayamung marok parnoki benogo.

Takoker champion telok nem sen lakh 2, tanabuba (runner - up) nem sen lakh 1 senpettsüogo. Iba den nija senpet (individual prizes) parnok yagi agizük: Best Goalkeeper - Supongnenba (Chargers FC), Best Mid-Fielder - Tongpangnokdang (Charger FC), Best Defender - Pangersunep (Doyang Strikers), Player of the Tournament - Yami Longvah (Doyang Strikers) aser Highest Scorer - (i) Longkhohi (Chargers FC) aser (ii) Horam (Doyang Strikers), tenapronglai iba asayamung nung goal pungungu (5 goals each) agütsü.

Tanü iba final match nung mezüing asaya tesadang tashibo telok anaprongi goal agütsütsü kanga merangaka, shingaia kata

magüteti anisüngzüik mapang atong. Asayartem tesem melenteper külen, minute 50 or lia Doyang Strikers-i free kick ka metsüdang Jersey No. 11, Yami-i goal tajung ka idaktsü. Aji sür Chargers-temia ball aiben bener tua D-Box telung nungi ishíbenbo goal yoktsü merang, saka Doyang defender-temi lendong aketba ball kata maitdaktsüi jara atong ama kanga junga noktangteta liasü.

Khenpika asaya-a arur külen, ano Doyang nungisa Jersey No. 10, Horam-i D-Box telung nungi goal tajung ka metsüoktsü. Iba ball ji par külem medemer kadi kanga junga yanglutsü aser Chargers defender-temi iba lendong aketba ball ji menoktangtet aser goal keeper-ia mepushiteti idaktsü. Tanü Chargers FC goalkeeper Supongnenba-i lendong aketba ball aika kümzüik/teptok.

Charger telokia kanga meranga asaya-a arur minute 81 nung Jersey No. 12, Illanger-i D-Box line meta talang nungi goal tajung ka idakja goal 2-1 küm daktsü. Iba goal idaktsüdangji Chargers FC

pukümertem Imkongmeren Sports Complex ajak anakshidakja jokshishia pelatep. Iba sülen asayaji milak janrur amai küma telok anaprongi goal yoktsü kanga merangtep, saka shingaia magütsüteti asaya mapang tembang.

Tanü final match nung asaya ketdangsürtemji; Sashimeren (main referee), Perong (Asst. referee), Temjenwapang (Asst. referee) aser Merang (fourth official) par pezü liasü. Mokochung District Football Association (MDFA)-i tanü Mokochung District team tenüing sangdongogo. Tenüing zünga ashir rongnung; Super Seniors FC nungi asayar par 4, Team Gilgal nungi par 8, Doyang Strikers nungi 2, Chargers FC nungi 15, SSS nungi 6, Sangpang SC nungi 4, Intermingle Club nungi 3, Telongjem FC nungi par 6 aser Tunder Bolt nungi 2 ta ajak senteper parnok 50 liasü.

Tanü iba asayamung shibangba aser senpet agütsüba sentong nung Dimapur Municipal Councilor, Longtrok FC tir, NPF Youth Wing Dimapur Division tir, Lanuchuba tetushi tesemdang liasü.

Ind vs Aus: India-i tasembuba ODI wicket 9 agi kokogo

Mongputeni/October 25, 2025 (Agencies): Honibarnü Sydney Cricket Ground nung India aser Australia na tasembuba aser tatembangbuba ODI asaya India-i wicket 9 agi kokogo. Run arishiba mapang Rohit Sharma aser Virat Kohli nati tongtibang shilem agia liasü.

Australia-i mezüingbuba asaya ana koka iba asayamung kokatoker liasü, saka tatembangbuba asaya ya alizüing tasen tongtetba aser teti bilemtetsüsa tajangshiba yanglua ayuba asaya ka liasü. Asaya nung Rohit-i pa indang career nung international century 50buba yanglu. Pai out mesüi run 121 yanglu aser Kohli-ia kanga junga asaya-a out mesüi run 74 yanglua liasü.

Tenati out mesüi run 168 yanglua over 38.8 nung India team takok dangi ani. Iba asaya ya tena asoshi Australia nung

tatembangbuba asaya asütsü akok.

Rohit Sharma-i ball 105 nung dang pa indang career nung ODI century 33buba yanglu, koba international century 50buba (Test nung 12, ODI nung 33, T20 nung 5) liasü. Asaya nung pai four 13 aser six asem azük. Iba century yangluba ajanga pai Kohli ajateta Sachin Tendulkar den külemi Australia nung century timtiba yangluba India nung asayar kümogo. Pai iba alizüing ya Tendulkar dang nungi asaya ishiba nung tongteta liasü.

Kasa mapang nung mezüingbuba asaya ana nung duck achiba sülen Kohli-i tasembuba ODI yabo kanga junga asayaogo aser pa indang career nung ODI half-century 75buba yanglua liasü. Tenati asaya kanga junga azüoka asaya aser ball 69 anunga lia asaya koka liasü.

Iba asaya nung India nung bowler tem rongnungi Harshit Rana-i kanga junga asaya-a run 39 agütsür wicket 4 agi. Axar Patel aser Washington Sundar nati asaya tom nung asaya kanga junga azüoka asaya aser Mohammed Siraj o Prasidh Krishna natia tongtibang wicket agia liasü.

Australia team-i asaya kanga junga tenzüik aser Mitchell Marsh (41) aser Travis Head (29) na team jenjang kanga junga yanglutsü, saka asayayonga aoba mapang junga masayateti parnok asayar ajak out sür run 236 dang yangluteta liasü.

2027 World Cup masaya tsüingda Australia nung ODI asayamung asayatsü kecha sentong yanglua mali asünung Rohit aser Kohli na atema iba asayamung ya Australia nung tatembangbuba asayamung asütsü ta amanger.

Elena Rybakina WTA final asayatsü maongka ngutetogo

Mongputeni/October 25, 2025 (Agencies): Elena Rybakina-i WTA Finals asayatsü atema tibuba aser tatembangbuba spot ngutetogo. Hokolbarnü Victoria Mboko koka Tokyo nung Pan Pacific semi-finals tongtetba sülen lai iba maongka ngutetogo.

Kazakh tsürüla yagi 6-3, 7-6 (7/4) agi Mboko koka Japan yimtiba nung semifinal tongtetba sülen tang agi küm asembuba atonga WTA Finals asayatsü lir.

WTA Finals atema tatembangbuba spot asoshi Rybakina ya Russia tsür Mirra Andreeva den toktepa liasü. La Aryna Sabalenka, Iga Swiatek, Coco Gauff, Amanda Anisimova, Madison Keys, Jessica Pegula, aser Jasmine Paolini nung den November 1 nungi 8 tashi iba season tembangba asayamung nung shilem agitsü.

2022 Wimbledon champion yagi taoba hopta China nung Ningbo Open akokba densema taküm kanga takok ngua asayaba sülen Saudi Arabia nung temaba jenjang nung aliba asayartem asayaba asayamung nung shilem agitsü maongka ngutetogo.

Rybakina-i iba asayamung

atema qualfy sütetba atema kanga pelaba lemsatepogo aser ashiba agi temaba jenjang nung aliba asayartem den tokteptsü jangrademtsüka asütsü. Laisa, qualify asütsü atema mapang talangka asayatsü nüngdaker ta meteta lir asünung asaya ka nungi asaya ka dak rangloker asayaogo, ta ashi.

Pan Pacific quarter asaya nung number two seed Rybakina-i asaya kanga tashi ita tenzüik aser mezüingbuba set ayong ayonga akok. Ajisüaka tanabuba set bo kanga toktepa asaya aser Rybakina-i set point ka kümzüikba sülen tiebreak asayaba koka liasü.

Rybakina-i ace pongu ao aser winner 23 ngua liasü. Laisa, iba asaya akoktsü temela masü asü ta ashiba den asaya koktetba atema kanga pelaba lemsatepogo.

Rybakina-isa, asaya aika asayaba sülen belemba lemsatep, saka finals nung junga asayatsü nükjidong lir ta ashi. Lai la temang kanga junga anepalua season anema tembangtsü koda tongtibang iba indang lemsatep.

Paolini-a taoba hopta Ningbo nung semi-finals atongba sülen WTA finals atema qualify süa liasü.

Men's Junior World Cup nungi Pakistan atsüingniba HI-i mejangja

Mongputeni/October 25, 2025 (Agencies): India nung asayatsü aliba 2025 Men's Junior World Cup nung Pakistan-i masayatsü telemtetba agiba International Hockey Federation-i jangjashitsüogo, ajisüaka iba dak sendakba nung osang kecha mangazük ta Hockey India-i metetdakja liasü. FIH-i ashiba agi, November 28 nungi December 10 tashi Chennai aser Madurai nung asayatsü aliba asayamung atema Pakistan melena team ka shimba yakta sangdongtsü.

Iba asayamung nungi Pakistan atsüingniba indang parnok kecha memetet, ta HI-i ashi.

"Pakistan atsüingniba indang FIH nungi kecha osang mangazük. Ni Pakistan Hockey Federation den ita ka ser tesadang tejakdang sensaksemogo aser parnok asayamung nung shilem agitsü ta shiogo," ta HI secretary general Bholanth Singh-i news agency PTI dang ashi.

"Iba sülen kechi atalok ni mejangja. Onok mapaji asayamung ayongba linük ama asayamung tajungtiba ayongzüka asayatsü asoshi lir aser India-i asayamung akoktsü imlar. Pakistan temelen shimtsüji FIH dak aket," ta paisa shisem.

Kasa mapang nung FIH-i, parnok temelen team ka bushitsü ta ashiba mapang ano Pakistan Hockey Federation (PHF)-i neutral venue ka nung asayara parnok iba asayamung nung asayatsü mulunga lir ta shiogo.

PHF secretary general Rana Mujahid-i Hokolbarnü ashiba agi, linük ana tsüingda mangatetep aliba ajanga national junior team India-i maotsü telemtetba agiogo aser iba osang FIH nem agütsüogo.

"Kasa mapang nung onoki FIH dang Junior World Cup nung asayatsü atema neutral venue ka anepalutsütsü mepeshia asüingdangogo, kechiyong India nung asayaba ajanga asayamung tongtibang ka nung shilem magiba agi linük hockey asaya aser onok asayartem terenlok dak kongshir," ta pai ashi.

"Tanga asaya nung neutral venue tem nunga asayartemi salem dena mesürnung kodaser onok India nung oa asayatsü imlar, ta onoki FIH dang shiogo. FIH-i ashiba agi, mepetmesü madok tsüingda asayamungtem ayongzüka asayatsü atema India nem temelaba agütsür liasü aser shingaia iba amai ataloktsü imla maliasü," ta Rana-i shisem.

BILEMDANGANG

"Kibuba kü sannüker ni kechaia manüngtsü."